

Quand'ella canta in mè quell'aria languente
Naviga in dolci mari la me fantasia
Di l'albe chì ùn sò più risplende la magia
Tutta la giuventù si leva... è m'hè presente

Correnu dananzu à l'ochji meravigliati
Catene di monti turchini à l'infinitu
Pinete è valdi cupi, è machjetu fiuritu
Calanche è scogli da lu mare... flagilati

Scopru à li fianchi d'una sarra appiticate
Accolte a brada cume capre in lu piazzile
Di tondu à la chjesola, cù lu campanile
Casarelle di petra nuda musgingate

È l'ora calma induve lu cansa lu gjornu
A campanella chì chjocca l'Ave Maria
I campagnoli sparsi invitu à lu ritornu
A banda di le sgiotte affulena la via

U sole s'hè ciuttatu una ghitarra sona
Un'ardita brunetta affacca à lu purtellu
È lampa un carofulu rossu à lu zitellu
Innamuratu chì li canta la canzona